

XXI Asembleia Estadu Parte sira ba Estatutu Roma ba Tribunál Penál Internasionál

The Hague, Reino de Países Baixos

Loron-5 to' o loron-10, fulan-dezembu 2022

Tribunál Penál Internasionál

Vijésima Primeira Sesaun Asembleia

Estadu Parte sira nian

Debate Jerál

Komunikasaun hosi

S. Ex.^a Prokuradór-Jerál Repúblika

Alfonso Lopez

Haia, fulan-dezembro 2022

Señora Prezidente

Exelênsia, ilustre delegadu no representante sosiedade sivil no organizasaun naun governamentál sira

Ha'u sente onradu hodi bele dala ida tan dirije Assembleia Estadu Parte sira Estatutu Roma nian.

Ita-boot sira permite ha'u hodi hahú atu kumprimenta Señora Prezidente no ninia ekipa ba servisu ne'ebé hala'o to'o daudaun ne'e iha prezidênsia no estende kumprimentu ne'e ba Prezidente Tribunál, ba Prokuradór no ba Sekretáriu, no mós atu felisita liuliu Prokuradór-Adjuntu sira ba ninia eleisaun iha vijézima sesaun Assembleia Estadu Parte sira nian, hodi hato'o votus ba susesu barak.

Señora Prezidente,

Vijézima primeira Assembleia Estadu Parte sira nian sai nu'udar marku úniku no istóriu ba Tribunál Penál Internasionál, tanba iha Assembleia ida-ne'e ita sei celebra nu'udar forma simbólika vijézimu aniversáriu hodi tama iha vigór Estatutu Roma ba Tribunál Penál Internasionál, úniku Tribunál ho karákte permanente no universál, katak liuhosi valór hirak ne'ebé representa sai nu'udar fundamentál atu hala'o justisa internasionál.

Timor-Leste hatene, liuhosi esperiénsia ne'ebé nia hetan, saída mak krime internasionál grave no oinsá difísil no sensível hala'o justisa, laiha buat ida-ne'e la bele hetan pás sustentável no duradoira.

Tanba ne'e, iha oportunidade ida-ne'e ami hakarak atu reafirma katak Timor-Leste sai nu'udar defensor ba Tribunál Penál Internasionál, kompromete ho promosaun ba Estadu-de-Direitu, ho luta kontra impunidade responsável sira nian ba krime internasionál grave liu no a favór ba hala'o justisa no reparasaun ba vítima krime sira nian ne'ebé kruél liu kontra direitu internasionál.

Responsabilizasaun kriminál hosi sira-ne'ebé komete krime internasionál grave sira, hodi respeita direitu ba defeza, seguramente sai nu'udar instrumentu esensial ida ba promosaun justisa no pás mundiál, maibé signifika mós katak uza forsa proibidu no la kompensa.

Señora Prezidente,

Tribunál Penál Internasionál to'ó daudaun ne'e konfronta ho dezafiu foun no kompleksu no ezije resposta ne'ebé reafirma valór hirak ne'ebé representa.

Ohin halo sentidu liu sai nu'udar fundamentál katak Estadu Parte sira la nakadoko iha sira-nia apoiu ba Tribunál no ba direitu internasionál no, katak empeña iha espíritu ida ba diálogo konstrutivu atu adapta Tribunál ba nesesidade no dezafiu sira mundu kontemporáneu nian, hodi sai efikás liu ho rezultadu ne'ebé bele hetan.

Iha sentidu ida-ne'e, relatóriu hosi peritu independente sira ne'ebé apresenta iha última assembleia jerál, la identifika de'it dezafiu sira ne'ebé Tribunál konfronta, maibé apresenta mós rekomendasaun spesífika sira, hodi, tanba ne'e, sai nu'udar instrumentu exelente ida servisu nian, ne'ebé tenke hetan konsiderasaun hosi Estadu Parte sira iha ámbitu diálogo ida abranjente no konstrutivu, hodi hatene katak sai nu'udar responsabilidade Estadu Parte sira nian garante kondisaun sira atu Tribunál bele kumpre ho efikásia no efisiénsia boot ninia nobre misaun.

Ami realsa nu'udar ida hosi dezafiu importante hirak-ne'e nesesidade atu hala'ó ho lalais tebetebes iha investigasaun, iha akuzasaun no iha julgamentu sira. Iha ámbitu ida-ne'e rekomendasaun sai nu'udar adekuaudu no tenke merese atensaun hosi Tribunál no hosi Estadu Parte sira.

Dezafiu adezaun hosi Estadu sira seluseluk ba Estatutu Roma hodi konkretiza pilár universalidade la bele desliga hosi reforma hirak ne'ebé relatóriu hosi peritu independente sira identifika no rekomena, tanba hodi hamosu de'it kondisaun sira atu halo Tribunál sai lais, efikás no eficiente liután no hodi hadi'a kooperasaun ho Estadu Parte sira no Estadu hirak ne'ebé aseita ninia jurisdisaun Tribunál bele hetan fiar liután no nune'e konvense Estadu Naun Parte sira atu adere ba Estatutu Roma.

Señora Prezidente,

Ita-boot sira permite ha'u atu ramata hodi reafirma disponibilidade tomak Timor-Leste nian atu koopera besik liután ho Tribunál no hala'ó servisu ho prezidénsia no ho delegasaun sira hotu atu nune'e ita bele hetan rezultadu pozitivu sira, ne'ebé iha tempu hanesan proteje independénsia no integridade Tribunál nian no, halo nia sai eficiente no efikás liután no kontribue ba universalizasaun Estatutu Roma nian ne'ebé ita dezeja tebetebes.

Obrigadu barak.